

Uunga siunnersuut:

Aningaasarsianit akileraarutit pillugit Inatsisartut inatsisaata allanngortinneqarneranik Inatsisartut inatsisaat

Aappassaanneernejarnissaanut Naalakkersuisunit saqqummiunneqartoq.

§ 1-imut

1. § 1, nr. 1, imatut oqaasertalerneqarpoq:

“1. § 2, *imm.* 6, imatut oqaasertalerneqarpoq:

” *Imm.* 6. *Imm.* 1 malillugu akileraartussaataitanermi taamaallaat isertitat aamma isertitanut tunngavigineqartussat taaneqartut kisimik pineqartunut ilaatinneqarput, taamatullu aningaasartuutit isertitanut imaluunniit isertitanut tunngavigineqartussanut taakkununga tunngassuteqarpata, aatsaat taakkua ilanngaatigineqarsinnaallutik. Inunnut *imm.* 1, nr. 1 malillugu akileraartussaataitasunut, aningaasarsiarititat 10 procentiinik, taamaattoq ukiumut amerlanerpaamik 1.000 koruuninik, ilanngaasiisoqassaaq.”

2. § 1, nr. 8, imatut oqaasertalerneqarpoq:

“8. § 19 a kingorna ilanngunneqarpoq:

” § 19 b. Akiliunneqarluni angalanerit § 34, *imm.* 1, nr. 15-imi taaneqartut eqqaassanngikkaanni, akiliunneqarluni angalanerit nalingi aningaasartuutitut sulisitsisup angalanermut akiligaannut, aalajangersarneqassapput, taamaattoq takuuk *imm.* 2 aamma 4.

Imm. 2. Taamaattoq Kalaallit Nunaanni aallarfiup Kalaallit Nunaannut ornigassamut uterlugulu imaluunniit Kalaallit Nunaanni aallarfiup Københavnimut uterlugulu akornanni ataasiarluni akiliunneqarluni angalanerup nalinga, nr. 1-3-mi annertussusiliussanit annertunerinnaangilaq. Angalanermi akigitaq Københavnimut angalanerup akianit annertunerunngippat, Københavnimukarnissamut taarsiullugu ornigassaq alla Kalaallit Nunaannut toqqaannartumik timmisartumik attaveqartoq atorneqarsinnaavoq. Angalanermut aningaasartuutitut uppersaateqanngippat, takuuk *imm.* 1, akiliunneqarluni angalanerup nalinga aalajangersakkami matumani ilaatinneqartoq aalajangersarneqassaaq:

1) Angalanermut ataatsimut 17.680 kr. (2022-mi inissisimaneq).

2) Meeqqamut 2-nit 11-nut ukiulimmut ataatsimut angalanermut ataatsimut 8.840 kr. (2022-mi inissisimaneq).

3) Meeqqamut 2-t inorlugit ukiulimmut ataatsimut angalanermut ataatsimut 1.760 kr. (2022-mi inissisimaneq).

Imm. 3. Ullut ilai inuussutissarsiornermut siunertanut aammalu ullut allat nammineq inuttut siunertanut atorneqartillugit angalanerit nalingi *imm.* 1-imituulli akileraaruserneqassapput, nalinga ullunik inuussutissarsiornermut siunertanut atorneqartunut naleqqiussilluni annikillisinneqassalluni. Taamaattoq angalanerup feeriarnarup, qaangiuttoornerit sulinngiffeqarfiginerisa, sulinngiffeqarnerup imaluunniit nammineq inuttut siunertap taamaaqataata sivilisussusaa uninngaarnerup 50 procentianit sivilisunerusimappat imaluunniit

ullunit ataqatigiissuni 5-init sivisunerusimappat, aatsaat angalaneq akileraaruserneqassaaq. Aammattaaq nammineq atukkat nalingi minnerpaamik 1.000 koruuniussasoq piumasaqaataavoq. Oqaaseqatigiit siulliit aappaallu malillugit naatsorsuinermi ullut angalaffiusut, arfininngornerit, sapaatit nalliuttulli ilanngunneqassanngillat. ”Ullut nalliuttut” paasineqassaaq tassaasut ukiutoqqap ullua, ukiortaap ullua, kunngit pingasut ulluat, sisamannorneq illernartoq, tallimannorneq tannaartoq, påskip ullua, påskip ulluata aappaa, tussiarfissuaq, qilaliarfik, pinsip ullua, pinsip ulluisa aappaat, Kalaallit Nunaanni inuiattut ullorsiorneq, juullip unnukkuutaava, juullerujussuaq aamma juullip naggataa.

Imm. 4. Feeriarnissaq siunertaralugu sulisup nalinginnaasumik najugaqarfiata aammalu suliffiugallartussap, imaluunniit aalajangersimasumik suliffiusussap, pineqartup sulinermini uninngaarfigeqqusaanngisaata akornanni angalanerit, angalanermut ataatsimut 2.000 koruuninik akileraaruserneqassaaq.

§ 19 c. Ukioq isertitaqarfiusoq 2023 aallarnerfigalugu ilanngullugulu § 19, imm. 2-4mi, § 19 a, imm. 2, nr. 1-2-mi, § 19 a, imm. 4-6-imi aamma § 19 b, imm. 2, nr. 1-3-mi naligitat akigititanik naleqqussaannermit procentiliussamik iluarsineqassapput. Nalingi koruunit aningaasartaannut iluitsumut qaninnermut annikillisinneqassapput. Akileraartarnermut ingerlatsiviup ukiup isertitaqarfiusup annertussusiliussat atuuffissaata siuliani kingusinnerpaamik qaammatsiutit malillugit ulloq 10. oktobari ukiumut isertitaqarfiusumut annertussusiliussat atuuttut ukiumoortumik nalunaarutigisassavai.””

3. § 1, nr. 11, imatut oqaasertalerneqarpoq:

“**11.** § 36 b, imm. 2-mi oqaaseqatigiit pingajuata kingornanut oqaaseqatigiittut nutaatut ilanngunneqarpoq:

”Akileraartussaaitaasoq akileraartarnermut ingerlatsiviup piumasaqarneratigut piffissamut killiliussap akileraartarnermut ingerlatsivimmit aalajangersarneqartup, kisianni ullunit 60-init sivikinnerusinnaanngitsup, iluani uppernarsaat nassitutissavaa.”

4. § 1, nr. 17, imatut oqaasertalerneqarpoq:

“**17.** § 73, imm. 1-imi oqaaseqatigiit siulliit imatut oqaasertalerneqarput:

”Ingerlatseqatigiiffinnut akileraarutit, nunamut tamarmut akileraarutit, kommuninut ataatsimoortumik akileraarut, kommunimut akileraarutit nunamullu tamarmut akileraarutit immikkut ittut kapitalimi matumani maleruagassanut naapertuuttumik akilersinniarneqassapput.””

5. § 1-imi nr. 01-itut nutaatut ilanngunneqarpoq:

”**01.** § 88, imm. 2-mi oqaaseqatigiit siulliit kingornanut oqaaseqatigiittut nutaatut ilanngunneqarpoq:

”Ingerlatseqatigiiffiit aktiaatiminnik il.il. niuerfimmi maleruagassiiviusumi niuerutigineqartussatut ilanngussisimasut imaluunniit pappiaqqanut nalilinnut sullissivimmi nalunaarsortitsisimasut, iluanaarutininik tigusaqartut taamaallaat ingerlatseqatigiiffiup ilisimasai pillugit paasissutissanik nalunaarutiginninnissamut pisussaaffeqarput.”

§ 2-mut

6. § 2-mi imm. 01-itut ilanngunneqarpoq:

” *Imm. 01.* § 1, nr. 01, inatsisip atuutilernerata nalunaarutigineqarnerata aqaguani atuutilissaaq aammalu 2020-mi ukioq isertitaqarfiusoq aallarnerfigalugu ilanngullugulu atuutissalluni.”

Siunnersuummut nassuiaatit

Nassuiaatit nalinginnaasut

Allannguutissatut siunnersuummut siunertaasut pingaernerit marluupput: Inatsisissatut siunnersuutip kalaallisoortaani annikinnerusunik oqaatsitigut amigaateqartoq tikkuarneqarpoq. Taamaattumik allannguutissatut siunnersuummi suullertut siunertaavoq, inatsisip oqaasertaasa kalaallisoortaata danskisoortaatalu oqaatsitigut imminnut naapertuunnissaasa qulakkeernissaa.

Aappaattut allannguutissatut siunnersuut inatsimmi § 88, imm. 2-mut allannguutissatut siunnersuummik imaqarpoq.

Inatsisartut inatsisaanut nr. 41, 2. december 2019-imeersumut ilaatillugu ingerlatseqatigiiffiit Kalaallit Nunaanni angerlarsimaffeqartut iluanaarutininik tunniussinermi iluanaarutininik tigusaqartut pillugit akileraartarnermut ingerlatsivimmumut nalunaarutiginninnissamik pisussaaffilerneqarput. Tamanna inatsimmi § 88, imm. 2-p allanngortinneqarneratigut pivoq. Aalajangersagaq iluanaarutininik tigusaqartut pillugit paasissutissiinissamik pisussaaffeqarnermut ilaatitsinnginnernik imaqanngilaq.

Grønlandsbanken paasissutissiivoq aningaaserivik immaqalu aamma ingerlatseqatigiiffiit aningaasanut niuerfimmi nalunaarsorneqarsimasut allat pisuni tamaginni aktiaateqartut kinaassusersisinnaasannngikkaat. Taamatuttaaq taamatut pisoqartillugu ingerlatseqatigiiffiit iluanaarutininik tigusaqartut pillugit paasissutissanik tunniussisinnaasannngillat. Ajornartorsiut ingerlatseqatigiiffinnut aningaasanut niuerfimmi nalunaarsorsimasunut nalinginnaasuuvoq, kisianni ullumikkut taamaallaat Grønlandsbanken pineqartunut ilaalluni, tassami Grønlandsbanken maannakkorpiaq ingerlatseqatigiiffinni Kalaallit Nunaanni najugaqartuni aningaasanut niuerfimmi nalunaarsorsimasuni kisiartaammat.

Siunnersuutigineqarpoq maleruagassat qasukkartinneqassasut, taamaalilluni ingerlatseqatigiiffiit aningaasanut niuerfimmi nalunaarsorsimasut paasissutissat taakkua ingerlatseqatigiiffimmit ilisimaneqarpata taamaallaat iluanaarutininik tigusaqartut pillugit paasissutissiisalissallutik.

Tunngaviusoq

Iluanaarutininik tigusaqartut pillugit paasissutissat pingaartumik suliffeqarnermut ilanngaatip naatsorsorneqarneranut atatillugu atorneqartussaavoq. Iluanaarutit – ilanngullugu Kalaallit Nunaanni ingerlatseqatigiiffinnit – isertitanut tunngavissani ilaatinneqarneranni akileraarutitigut soqutiginninneq, ingerlatseqatigiiffiup piginnittuisa aamma ingerlatseqatigiiffimmi sulisuusut, aningaasarsiat iluanaarutillu katitigaaneranni iluanaarniapilunnissamik soqutigisaqartussaagaluarnerat, pakkersimaarneqassaaq.

Sulinermut ilanngaat isertitani (2020-mi) 386.000 koruunit sinnerlugit annertussuseqartuni annikillisikkiartuaarneqartarpoq. Taamatut annikillisitsiartuaarnissaq pinngitsoorniarlugu ingerlatseqatigiiffiit piginnittui 386.000 koruuninik imminnut aningaasarsiaqartinnissaq toqqarsinnaassavaat, qaffasinnerpaamik sulinermut ilanngaateqarsinnaalersitsisumik, aammalu iluanaarutit annertunerusunik isertitanik tunniussillutik. Taamaalilluni maleruagassat sulinermut ilanngaatip naatsorsorneqartarneranut tunngatillugu aningaasarsianik iluanaarutinillu sunniuteqanngitsumik suliarinnissinnaalersitsissapput.

Iluanaarutininik tiguisit pillugit paasissutissat tamatuma saniatigut, nunani allani aktiaatillit piginneqataassutillillu utertillugit akiliinissamut qinnuiginninnerisa marloriaammik akileraarusiisarnermut isumaqatigiissutit Kalaallit Nunaata akuerisimasai malillugit suliarineqarnerannut atatillugu akileraartarnermut ingerlatsivimmut nakkutiginninnermi tunngavissatut attuumassuteqartorujussuupput.

Ingerlatseqatigiiffiit aningaasanut niuerfimmi nalunaarsorsimasut aktiaatillit kinaassusaat pillugit paasissutissanik pissarsisinnaanerat pingaartumik ingerlatseqatigiiffinnut inatsimmi maleruagassiivigineqarpoq. Ingerlatseqatigiiffiit aningaasanut niuerfimmi nalunaarsorsimasut aktiaatiminnik pappiaqqanut nalilinnut sullissivikkoortumik tunniussisarpoq, tassani aktiaatit niuerutigineqartarlutik aammalu taakkunannga uninngasuutigineqartut nalunaarsorneqartarlutik. Iluanaarutininik tunniussineq pappiaqqanut nalilinnut sullissivikkoortumik aammalu toqqorsivinnut sullissiviit ataasiakkaat aqqutigalugit pisarpoq. Tamatuma saniatigut aktiaatit toqqorsivimmi katersuiffimmi toqqorsivinnut sullissivimmit aqunneqartumi, aammalu aktiaatillit amerlasoorpassuit uninngasuutaannik imaqartumi, inissisimatinneqarsinnaapput. Taamatutaaq toqqorsivinnut sullissiviit tulleriissaartuusinnaapput, taamaattumik tulleriissaartuni toqqorsivinnut sullissiviit ataasiakkaat aamma toqqorsivinni atiminniittuniittut aktiaatillit ataasiakkaat kinaassusaat ilisimasarnagu. Ingerlatseqatigiiffiit aningaasanut niuerfimmi nalunaarsorsimasut taamaattumik pisuni tamaginni kina naggataatigut iluanaarutininik tigusaqarsimanersoq pillugu paasissutissanik peqartanngillat.

Naliliisoqarpoq paasissutissat ingerlatseqatigiiffimmit aningaasanut niuerfimmi nalunaarsorsimasumi ilisimaneqarpata, ingerlatseqatigiiffiit iluanaarutininik tigusaqartut pillugit paasissutissanik nassiussinissamut suli pisussaaffilerneqartariaqarput. Ilisimaneqartut paasineqassaaq tassaasoq, ingerlatseqatigiiffik inatsisit atuuttut malillugit piffissami iluanaarutininik tunniussiviusumi aktiaatillit kinaassusaat pillugu paasissutissaateqartoq, assersuutigalugu ingerlatseqatigiiffiup aktiaatilinnut pineqartunut toqqorsiveqarluni sullissiviuneratigut.

Sulinermut ilanngaammut isertitanut tunngavissat eqqortumik naatsorsorneqarnissaasa qulakkeernissaa siunertarlugu, Kalaallit Nunaanni ingerlatseqatigiiffinnit aningaasanut niuerfimmi nalunaarsorsimasunit paasissutissat, akileraartarnermut paasissutissanik

paarlaasseqatigiittarneq pillugu isumaqatigiissut Danmarkimut isumaqatigiissutigineqartoq naapertorlugu danskit akileraartarnermut ingerlatsiviannit piniarneqarsinnaanersut, akileraartarnermut ingerlatsiviup misissussavaa.

Tamatuma saniatigut iluanaarutininik tigusaqartut pillugit paasisutissat, iluanaarutininik utertitsilluni akiliisarnerit akileraartarnermut ingerlatsivimmit nakkutigineqarnerannut tunngatillugu, sulii attuumassuteqartussaapput.

Allannguutissat siunnersuummi aningaasaqarnikkut sunniutaasussat

Allannguutissat siunnersuut annertuuninik aningaasaqarnikkut sunniuteqassanganneqanngilaq.

Allannguutissat siunnersuummi aalajangersakkanut ataasiakkaanut nassuiaatit

§ 1-imut

Nr. 1-imut

Inatsisip oqaasertaanni oqaaseq ”annertuumik” allanngortinneqarpoq imatut: ”amerlanerpaamik”.

Nr. 2-mut

Siunnersuummi § 19 b-p aamma § 19 c-p kalaallisoortani oqaatsitigut iluarsiiisoqarpoq.

Pingaartumik § 19 b, imm. 2-mi aamma imm. 3-mi oqaaseqatigiit kingulliit marluk, aalajangersakkani immikkoortunik amigaateqarneq pissutigalugu oqaasertaleqqinneqarput.

§ 19 c, imm. 1-imi kalaallisoortani § 19-imi innersuussineq iluarsineqarpoq.

Inatsisissat siunnersuummi § 19 c malillugu akiliunneqarluni angalanerup nalinga, siunnersuummi § 19 b, imm. 2, nr. 1-3-mi aalajangersarneqartoq siunissami akigititanut naleqqussaanermit procentiliussamik iluarsineqartassaaq. Inatsisissat siunnersuummut nassuiaatini nalinginnaasuni immikkoortoq 2.2-mi akigititaninik iluarsiiarneq pillugu allasimavoq, akigititat amerlanersai ukiumoortumik akileraartarnermut ingerlatsivimmit nalunaarutini ingerlaavartumik maleruagassiivigineqartartut, taamaattumik akigititaninik iluarsiiarneq suleriaatsimut naapertuulluni. Erseqqissarneqassaaq akiliunneqarluni angalanerit nalingannik aalajangersaanerit tulleriissaartumik periaaseqarluni iluarsineqartarsimanngimmata, taamaattumik inatsisissat siunnersuut immikkoortumi tassani maannamut suleriaasiusumut tunngatillugu allaanerusumik periaaseqarnissamik kinguneqarluni.

Nr. 3-mut aamma 4-mut

Naggammut (pkt.) kalaallisut oqaaseq iluarsineqarpoq.

Nr. 5-imut

Aktiaatinut il.il. niuerfimmi maleruagassiivigineqartuni niuerutigineqartussatut ilanngunneqartunut imaluunniit pappiaqqanut nalilinnut sullissivimmi nalunaarsorsimasunut, ingerlatseqatigiiffiit agguagarsititsisartoq iluanaarutininik tigusaqartut pillugit ilisimasaqanngissinnaavoq. Siunnersuutigineqarpoq ingerlatseqatigiiffiit taakkua, paasissutissat ingerlatseqatigiiffimmit ilisimaneqarpata, tiguisut pillugit nalunaarutiginninnissamik aatsaat pisussaaffilerneqassasut.

Nalunaarutiginninneq, paasissutissaq taanna ilisimaneqarpat, iluanaarutininik tiguisup kinaassusaa pillugu paasissutissanik imaqartussaavoq. Iluanaarutininik tiguisup kinaassusersinera, kinaassutsimut paasissutissat suut nalunaarutigineqassanersut pillugu akileraartarnermut ingerlatsivimmit erseqqinnerusumik innersuussineq malillugu, pissaaq.

Pappiaqqanut nalilinnut sullissivik paasineqassaaq tassaasoq ingerlatseqatigiiffik nalunaarsuisarnermik suliaqarnermik ingerlatsisoq. Nalunaarsuisarnermik suliaqarneq paasineqassaaq aningaasaateqarfiup pigisaannik pappiaqqanut nalilinnut, assersuutigalugu aktiaatit, sullissivikkoortumik tunniussineq aammalu taakkununga pisinnaatitaaffinnik pappiaqqanut nalilinnut sullissivimmi nalunaarsuiffimmi allattuineq.

§ 2-mut

Nr. 6-imut

Siunnersuutigineqarpoq § 88, imm. 2-p allanngortinneqarnera 2020-mi ukiumut isertitaqarfiusumut atuutilersumik atuutilissaaq. Taamaaliornikkut eqqarsaatigineqarpoq, ingerlatseqatigiiffinnut niuerfimmi maleruagassiivigineqartumi paasissutissiisussaataaeramik, inatsisit allat naapertorlugit naammassineqarsinnaanngitsunik, pisussaaffiliisunik aalajangersagaqarnissaa naleqqutinngitsutut isikkoqarmat.